

師伏堂駢文二種

師伏堂駢文卷二

演連珠

左氏連珠

滬上寄都中友人書

請復孝弟力田科議

海中觀日出記

大雪山行記

豫桐女史遺照題詞

史記引尚書攷自序

兩漢詠史詩自序

夏母高太恭人六十壽序

湖南糧儲道夏公芝岑墓志銘

王勳笙墓志銘

張孝達制軍壽序

代

尚書大傳疏證自序

游七星巖記

山莊翫月記

徵刻朱文端公藏書十三種啟

史通惑經篇書後

史通申左篇書後

師伏堂駢文

善化皮錫瑞

演連珠

蓋聞物無貴賤視彼所遇時有通塞惟其所當是以盈廷
貢諛鵠雀且以稱瑞俗目多怪獲麟亦爲不祥

蓋聞葦苕之鵲亦矜安巢豕鬣之蟲罔恤火化是以憂天
之士舉國謚爲大愚倚楹之女比鄰疑其欲嫁

蓋聞龍澤四海靡雲雨則不奮鵬搏萬里得扶搖而勢舒
是以鮑叔庸臣薦賢垂竹帛之烈臧文賢者竊位蒙鈇鉞
之誅

蓋聞詞能華國不必己出計可濟事不皆奇謀是以寶玉
徑尺鄰人竊之而拜爵并澠百金過客買之而封侯

蓋聞高談憑虛不厭恢詭涉世麗實難逃輶軻是以列能
御風歲歉不免於嫁衛莊論齊物家貧且貸於監河

蓋聞使麟守夜令鳳司晨旣無奏績之用彌失馭材之真
是以蹲龍之聖屈於委吏佩豹之勇厄於陪臣

蓋聞一目之羅無時得鳥獨繭之釣難以取魚是以鴻鸞
漸階朝廷猶設壇席白駒空谷山澤更下安車

蓋聞泰山巖巖譽之不加其高瀛海茫茫毀之無損其廣
是以喪家之狗尼山聞而欣然呼我爲牛柱下以之自養

蓋聞鹽車長鳴驚乃羞驥腐鼠自銜鴟方嚇鵩是以鄒繆
談王道而館人且疑其竊屨箕山薄天下而家衆反惑其
藏冠

蓋聞得馬折足後福乃蒙生憤失明吉祥可據是以先號
後笑匡衡不中而經明前沈後揚虞卿窮愁而書著

蓋聞夜光投道不如朽株芳蘭當門亦等惡草是以珠璣
並下鑑別乃有殊珍玉石俱焚煨塵非無國寶

蓋聞在上赫赫殃慶非必無徵視天夢夢倚伏有時難測
是以愚叟之山可移冤禽之海莫塞

蓋聞前有千古後有萬年惟此藐躬盍乎其間是以登高

淚下不盡遲暮之感臨川歎逝隱觸世運之遷

蓋聞傷時已往徒嗟鳳鳥望古遙集空慕鴻蒙是以采薇之夫慨黃農之忽沒扣角之子歌堯舜之不逢

蓋聞道長道消往無不復一治一亂生也有涯是以隆古之時嘗聞火熾水涸時雍之世乃有封豨修蛇

蓋聞幹運者道運去則道窮匡時者才時違則才廢是以媧皇蘆灰僅澹滔水之災崇伯息壤難遏橫流之勢

蓋聞澤麋蒙虎難爲生風之嘯螭蛇游霧終乏致雨之術是以榮夷專利無以折衝樽俎石父工讒莫能調和鼎寶蓋聞一寸之炬焚足繼晷五色之石鍊可補天是以葛扶

劉宗竟就偏安之業靡收夏燼乃起一成之田

蓋聞造父工御未及大丙神行盧敖善遊猶遜若士霞舉
是以刑賞致治乃非大同驩虞說民猶爲小補

蓋聞富貴天命匪必人謀求之者未盡得得之者不待求
是以子搜乘輿身先逃乎丹穴康回爭帝頭空觸乎不周
蓋聞韞輝在山草木蒙潤懷媚於水碣岸不枯是以振一
代之清風子陵無用高位激百世之頑懦伯夷止於匹夫
蓋聞窺豹一斑孰信其威覩驥一毛未知其駿是以效赤
誦之半吸難以昇仙摹素王之一端不克希聖

蓋聞一龍一蛇屈伸之常爲虎爲鼠用舍之異是以時當

其厄伐樹而削迹奚辭運際夫窮檻車之請囚弗避

蓋聞人之君子天之小人匪報施之或爽誠造化之不仁
是以羊舌宥宜十世一傳嗟狼子之滅牛車禍應無種七
葉承貂珥之恩

蓋聞山有猛獸林木弗采澤有神蛟方舟莫遊是以李牧
爲將罷東并之勢汲直卧病寢淮南之謀

蓋聞麟鬥日食乃戾氣之所招鯨死彗出由陰邪之隱召
是以鳴狐揭竿白登之虜斯張金狄入夢黃巾之禍已兆
蓋聞江河之流始自涓涓燎原之火肇自燄燄是以驪山
構難由征戎白鹿之師美稷居胡啟典午蒼鵝之變

蓋聞行周於魯未必能行變夏用夷尤非善變是以改鷄
鷄之胡服終致探轂之災乘小駟之異產被禽盜馬之戰
蓋聞化民之本寧樸毋雕馭世之術匪智伊道是以宋人
刻楮難爭造物之工墨子爲鳶未若車輓之巧

蓋聞王者杖黃鉞使敵兵以倒戈聖人有金城勝秦楚之
堅甲是以孟言孝弟不用徐承舟師荀說仁義可廢穰苴
兵法

蓋聞小辯破道異渾噩之書繁聲導淫殊疏越之響是以
簡可南面無爲密凝脂之法智利盜跖未若漏吞舟之網
蓋聞釜鬻適用而函牛之鼎斯寶肴核維旅而腥魚之俎

居前是以刀筆可使貴求宏通之士智謀難任必以重厚爲先

蓋聞執彈不能招鳥揮稅無以呼狗是以鳴犢旣誅乃發洋洋之歎扁鵲投石莫勝訑訑之口

蓋聞不斬犀革則龍泉偕鈍兵等質未試蟻封則驟耳與驚駘齊價是以才微筦庫或膺藩屏之崇器薄斗筲乃襄寒晏之化

蓋聞鑑醜者無怨明鏡復仇者不折鏢于是以刑人以公子羔獲跽跪之報秉鈞自恣師尹有不平之歎

蓋聞徑寸之簪得勢持千鈞之關槃木之根遇時登明堂

之上是以江湖狗盜奮力而化侯王山林牧羊輸財而致卿相

蓋聞眸子之睖眇於蒙塵太陽之光蔽彼氛祲是以才兼文武乃致掇蜂之疑治盛攻同終信女鳩之譖

蓋聞客議曲突終歸無恩鄰云築牆反疑見竊是以六太息之策賈傅卒困於長沙七死亡之章司隸幾誅於漢闕蓋聞人心變遷幻若蒼狗世路嶄絕險於龍門是以黎邛之鬼能化人父牛哀成虎乃噬其昆

蓋聞水平而澄風起則波人生而靜物感則變是以江湖魏闕子牟傷於神分禮義紛華子夏靡於心戰

蓋聞詹何垂綸取魚未若設網養由矯矢得鳥不及張羅
是以四豪之名易於布衣之俠千里之地功較湯武爲多
蓋聞衡泌可驕王公乃以困約爲累勢位足傲貧賤復以
傾覆爲憂是以墜馬傷生洛陽有慚於季主跼鳶仰視伏
波顧念夫少游

蓋聞要妙之道里耳所驚夷魚之清衆濁皆忌是以曜雲
麗景萬物仰觀而不能啟盲者之昏咸韶發聲千夫竦聽
而無以振聾者之寐

蓋聞珠沈於淵棄擲猶幸蘭漸以滫馨烈詎耀是以干將
補履已非得所而或鑄以爲鋤章甫薦屨慮不可久乃更

加之以溺

蓋聞天下之變常出於所備一人之慮不勝其豫防是以
虓勇之夫能制虎狼而失色於蜂蠆謹畏之士旣戒山險
而反躓於康莊

蓋聞各是其是孰知其非不狂爲狂尤失其實是以黑白
謬亂魯儒不能覺秦子之迷毀譽不知文摯難於已龍叔
之疾

蓋聞蘭生幽谷不以無人損芳月照空山不緣莫覩匿采
是以天下滔滔而鳳德弗衰風雨淒淒而雞鳴不改

蓋聞谿壑之欲限於難副冀望之私窮於所絕是以鴈隼

雖驚不希天上之兔烏虎狼雖貪不慕水中之魚鼈

蓋聞涉世之術莫若虛中至道之精藏於微細是以崇墉
千仞望者莫入而厲颿鼓盪於其間危臺十重墮者必傷
而螭蟲飛翔於其際

左氏連珠

蓋聞依人而行神自正直非鬼而祭謚爲至愚是以子產之明弗禳龍門臧孫不智乃祀爰居

蓋聞下喬入幽豈云善變逐臭於海尤屬非宜是以作楚宮者不復適楚效夷言者其死於夷

蓋聞國祚短長非關大小邦基堅脆不在弱強是以晉夸瘠牛晉先魯而分裂吳恣封豕吳先楚而傾亡

蓋聞禮失求野不妨學在四夷言詭駭人何必重夫九譯是以郊子之言鳳紀數典毋忘葛盧之辨牛鳴審音何益蓋聞妖不自作由人而興國聽於神將亡可決是以鬼謀

曹社必待弋鴈之人神賜土田終滅鴟賁之月

蓋聞事勢瀕危用人弗及國家閒暇棄才不任是以鄭懼東封急而求乎燭武齊侵北鄙命必受於展禽

蓋聞蜂蠆有毒小國固不可輕豺虎爲鄰強敵尤不宜玩是以魯公之冒懸諸魚門楚子之師敗諸鵲岸

蓋聞勝算先定好謀乃成大勢已推出奇弗救是以蒙馬敗楚不皆假虎之功燧象奔吳難逞困獸之鬥

蓋聞乘人於危非豪傑之舉歿世猶恨乃孫子之仇是以晝伏畏人笑齊君之似鼠師過軼我驚晉樞之如牛

蓋聞大敵要盟常懷蛇豕之毒強鄰結好勿信虎狼之仁

是以卻克脅齊戎車利夫東畝杞子戍鄭管鑰獻夫北門
蓋聞魁柄下移孰知共主霸圖肇起但畏強侯是以王子
狐之爲質終取禾而交惡公孫蠆之先濟繼苦葉而具舟
蓋聞理有可從徇上意則猶正訟非難斷撓權勢則堪羞
是以所右所左士句隱遵夫天子上手下手州犁乃請於
鄭囚

蓋聞無知人之明則輕侮召禍乏禦敵之畧則假仁爲高
是以曹伯見俘皆由薄觀駢脅宋襄傷股乃謂不禽二毛
蓋聞乾餼以愆怨不在大貪求無度亦必以終是以甕起
雙雞子之徒能援柄禍生兩馬令尹卒致爭宮

蓋聞富有四海且或患貧賤若匹夫猶憂懷寶是以求金
毛伯早開避債之端獻玉宋人隱示不貪之道

蓋聞人之性惡未必全誣天之報施有時或爽是以生兒
虎狀於菟幾至餒而弑父豺聲厥貉且將爭長

蓋聞宴安鴆毒好色爲尤大澤龍蛇禍機隱伏是以女戎
亂國驪姬迫雉經之冤尤物移人狼子滅羊舌之族

蓋聞吉凶妖祥智者先見禍福倚伏愚者難量是以乞食
野人狐氏識其天賜富淫聚族豹也以爲天殃

蓋聞見虎而驚則虎乘其懼談鬼而慄則鬼制其虛是以
梁伯溝宮魚爛之亡自取子常城郢餓豺之守終疏

蓋聞道非服習難以乘危機洩敵人必將敗績是以戰乘小駟晉戎馬旋渟而擒會在多魚齊豎貂漏師可惜

蓋聞夷夏攸分母棄地以資敵內外各別戒棄親而用羈是以魏絳和戎先陳賈土之利鄭丹在內乃失馭臣之宜蓋聞王靈尚存必先受命國體爲重母遽乞盟是以彤弓具陳叔興父奉揚於踐土玉磬致賂賓媚人慷慨於背城蓋聞軍旅之中尤宜恤士山林之內常有遺賢是以佩玉樂兮驚傳庚癸之呼絳人長矣慨對甲子之年蓋聞法令滋章盜賊多有科條過密恩信不孚是以叔向之責刑書今則已矣仲尼之譏鑄鼎晉其亡乎

蓋聞忌人而摧氣燄怪異乃生棄禮而索杳冥飾說何益
是以內蛇外蛇之門匪妖皆人新鬼故鬼之言似順實逆
蓋聞英雄能識英雄賢達能知賢達是以齊桓宋襄秦穆
三霸主皆結好於晉重平仲子產叔肸諸賢臣盡締交於
吳札

蓋聞三代以後錢可通神列國之時賂能敗國是以郤鼎
在廟華氏作亂而無誅魯錦適師昭公欲歸而不得

蓋聞惑溺之甚罔顧其私好尚之殊惟騁其欲是以爲牛
折齒不勝孺子之憐使鶴乘軒乃食大夫之祿

蓋聞振國威者威無不伸貪寶貨者貨先自賊是以處南

海處北海齊遠責夫苞茅滅下陽滅上陽虞近利乎垂棘
蓋聞立身有本雖危勿忘事大有常雖細勿許是以帶其
褊矣叔孫裂帛以自明玉敢辭之子產惜環而不與

蓋聞炙客劉毅終以成仇酒非公榮何能不與是以殺羊
食士私恨至於殘民解黻戲臣染指逮夫戕主

蓋聞昏明判於學識榮辱由於智愚是以能對黃熊祀郊
乃賜夫鼎不知相鼠聘魯徒美其車

蓋聞苦弱者無以制勝恃强者適以速亡是以臧紇侏儒
旣於狐貍敗績僑如長狄亦與虺豹同殃

蓋聞憂生之士尚寐無訛殉主之忠速死爲福是以文子

無及於難恐見殺夫老牛叔孫求納其君忍聞謠夫鸛鵒
蓋聞政荒則禮樂皆虛道廢則風化益薄是以魯舉致誚
咎儒書之爲憂周亂有徵傷學殖之將落

蓋聞門而不休者民苦其暴窮而反噬者人畏其橫是以
投龜詬天楚皆從亂鋌鹿走險晉反行成

蓋聞假夫名者其實必虛張於外者其中易測是以盟臨
黑壤徒彰晉霸之衰會長黃池不掩吳王之墨

蓋聞積忿旣深必逞其忿誠求旣切當應其求是以卻克
報齊庶其有豸范宣慰魯敢使無鳩

滬上寄都中友人書

故人天末長安日邊五噫出都單車就道長謠興歎不可
說也黯天沙黃匪地草白車行三日乃抵析津滄桑變遷
景物殊異海濱廣斥化爲鉅鎮坐待數日始登海舟廣半
江船地小客衆牛驥同皁人禽對巢海口逼仄荻蒿填淤
其中狹處僅容一舶停輪忽止候潮乃行如此數時不及
百里想見天塹設險關鍵甚堅但使重兵嚴屯夾岸疾擊
雖彼豕突詎得鴟張哉日午出口舟行始暢巨浸茫茫漸
失畔岸空水一色渺無纖塵洪濤連霄並絕飛鳥惟東北
一髮青營諸山時見翠光隱躍波際傍山而上厥名煙臺

昔日戍樓今者海市觀成山之罌之壯思秦皇漢武之盛
津通牛女難乘博望之槎地近蓬瀛詎憾劉郎之遠乃瞻
北顧感慨係之維時海天媚晴颭颭息響登艫曉望推蓬
夕眺朝暉暗升憾隱夫積霧夕景紅墜驚躍夫奔濤海色
霑袂染鬚眉而純青波光盪胷滌塵垢而俱化仰首則天
水噴薄長嘯則蛟龍震驚斯宇內之窮覽客遊之豪致也
俄而玄波觸天黑浪灌日慘淡墨池之水深黝金壺之汁
爰自成山驚乎巨洋覽滄瀛之大全極天池之深廣乃有
大聲起乎水上噫氣發乎土囊颭風橫驅海波僵立鼃極
爲之摧陷鯢溟疑於傾覆曹王兩輪之艦盪如葦杭南人

萬斛之舟飄若芥粒火力之猛強爭而退回汽機之奇反
激而倒縮震蕩竟日時虞傾沈同舟諸君面罕人色觀山
墜之勢則賈客驚號聞雷碾之聲則婦女夜泣非杜陵之
情惡乃病嘔卧異昌谷之苦吟幾吐血僕雖苦眩暈意
氣自若以爲文考之才子安之傑且不免葬魚腹沒蛟宮
惟此忠信足傲波濤死生命也何容憂懼乎槎山而下水
色漸清幸脫風波始抵滬瀆滬上風雜夷夏地分中西歌
吹聾耳金碧眩目妖姬競豔車行門風鬼火分紅夜朗逾
畫綠睛赤髮似入王會之圖左帶沸脣如覽十洲之記自
疑此身頓入異國矣足下揚聲天衢高步日下動履多豫

著述益宏士衡入洛茂先賞其瑋辭賓王至都常何薦其
鴻筆旣思振奮亦擴聞見奚必名山養性仰屋著書述節
信之潛夫詠泉明之歸去哉畧述所見藉塵彼觀征行恩
恩詞不宣備

請復孝弟力田科議

夫思皇多士側陋所以明揚疇咨熙載髦俊於焉並作殷
殿初基拾龍淵之寶虞祠始構獻鳳管之玉旌蒲出魯賁
帛歸齊頌聲旣興盛業斯在是知翼亮崇本陶化之所先
旌德禮賢敦俗之上務然而以言取士士飾其言以行取
人人竭其行才生於代窮達惟時而風流遂往馳騫成俗
雕蟲小技僅比顰悅之華鳴鳳高文亦同虛車之飾至乃
媒孽夸衒利盡錐刀敦履璞沈無聞里閭豈非鄉舉里選
不師古始稱肉度骨遺之筦庫重末輕本務華絕根之弊
哉有漢初構去古未遠盪亡秦之毒螫紹三代之遺緒孝

惠四年初下明詔孝弟力田皆復其身高后稱制孝弟尤崇官其一人至二千石至於文帝始置常員詔曰孝弟天下之大順也力田爲生之本也大哉王言實通政本於是舉孝無人比於蔽賢之戮重農貴粟著於賞罰之令白首郎中稱其篤行駿粟都尉入爲尊官豈止姜詩巨孝誠感鯉泉之流任氏力田名登龍門之傳此所爲純風獨扇而澆俗丕變也亞斯以降遺風更邈魏晉崇中正上品遂無寒門隋唐盛科名高才出於通榜由是譖牒譌誤冒襲良家文人詆訶爭長浮薄抑退敦樸羣驚聲華驅迫廉撝獎成澆競崇四方之孝讓空聞宋詔專士女於耕桑但傳齊

策而江革姜肱莫奉丹綸之詔趙過蔡癸未聞宗誥之褒
吳烏更巢廷議莫及卜羊重讓朝籍難登又况首戴茅蒲
身衣襪襖則雖令光解田三輔秦陽能蓋一州亦奚望其
登巍科以維薄俗哉夫春華雖茂未若秋實之堅浮文雖
華無如樸行之美是以南陔白華振徽宵雅于耜舉趾著
嫩豳風門內足顯真儒田間亦烝髦士漢制近古厥風可
徵後王改章其弊彌甚宜遵古制復此舊科孝弟者試以
職官力田者加之褒賞賓興六行首崇孝弟之修矇頌七
月常喜田畯之至庶使鄉閭下士隴畝閒民識純懿之可
風信稼穡之維寶爰鋤箕帚悔其諄語帶牛佩犢懲彼游

情將見羽林儒雅皆通孝經之文大農曉導盡識代田之術矣或謂毀譽多僞拔擢非真不知清議難逃鄉評莫恕但使搜揚茂實勿致別居之謠賞拔隱淪不遺躬耕之老請託旣絕采蘭斯馨干謁無庸瞻蒲自適則士族之子農家者流皆得揚聲紫微耀穎巖穴非止遠追兩漢亦且上繼三王豈不懿歟

海中觀日出記

海王百谷號爲重洋隔閼華戎劃分南北賈舶旣集波路
爲輕緬彼歸墟倏成坦道往來京師數乘此險目饜海色
耳習濤聲中流蛟虬相視若狎崖畔軀鳥舊盟能尋而海
多大風雜縣所避驚乎巨浸罔象攫人惟見驚濤屬天洪
浪濯日紅射鯨眼黑橫鼉身風潮擊撞則澎湃不息山島
滅沒則漂搖安歸陳從病饑杜老嘔卧畏途等視未窮其
勝也壬午秋賦歸自津門天霽雲平秋高氣爽宇宙輝朗
滄瀛鏡澄長波不興萬里一碧魚龍曜影盡作金光島嶼
媚晴橫分翠色忽有煙縷結爲樓臺人云氣噓乃出蛟蜃

遵海而南放乎登萊遠峯若軀巨石蹲虎浮出煙表峙乎
海隅成山之杲想秦皇之雄畧安期羨門企仙子之遐踪
而鼉梁已移鶴駕不返是知勢位雖盛終歸泯滅神舉之
說亦屬茫昧惟是注集仍然浩蕩睠彼橫流尤多感喟鯨
人潛織乃見陸居龍伯一釣幾沈壺嶠此則斷鼇極立長
懷媧聖之功斬蛟劍腥欲奮澹臺之氣落日欲暮登艘遐
觀天青盪胸海綠霑袂繁星亂點疑銀漢之可通朗月無
塵覺瓊樓之不遠固已神識盡徹氛垢全忘念琴操之移
情惜知音之不遇至於奇景尤在日出撫枕十起警天雞
之號披衣五更望陽烏之躍時則暘谷向曉搏桑報晴羲

鞭玻璃似有聲響霞景標建隱流赤光俄而金碧千重煙
波十色神龍蕩涵獻出明珠大鵬搏扶照此奇采雲光漸
淡若由赤而轉白寶氣上溢乃出水而麗天萬象澄清一
輪捧出蓋金風曉肅弗惜切肌之寒銀海花生並忘久視
之眩則尤奇觀冠乎宇內曠覽極乎平生者焉

大雪山行記

由松陽至宣平里方六十乃有峻嶺阻乎其中徑幽蛇縈
磴險鳥避猱迹俯接鶴巢危攀星辰下垂宜名夫北斗闢
闔仰望直近乎南天九折羊腸雙峯熊耳語彼阻峭詎難
齊觀蓋雖風日晴晏山徑曠乾行者慄然猶苦畏道予以
甲申正月往宣觀省初春正暄平懷無雪微雨若沐峭風
不寒乃促籃輿未至半嶺栗烈漸甚耳目改觀異境忽開
玉山竦峙盤折而上置身逾崇凍雲不飛落霰時撲長空
浩浩都無點塵大地搏搏惟見積素六花綴樹重冰結途
時搖碎珠若踐零壁疑入月府遊於廣寒娥冷鬪嬋婉凍

抱杵又疑乘風至彼三山觀臺銀光禽獸白色瓊樓玉宇
瑤林琪花梯雲有階去人奚遠何必羅公之術方聽霓裳
安期之舄始登蓬島俗垢盡撲清思更瑩靜餐雪光益崇
霞想所苦勝景雖絕嚴寒逼人山高風多凍合氣勁肌栗
疊起鬚毛亂拳慘節無溫皴膚欲裂重以冰筋交橫石壁
愁滑遠近一白不辨徑途失落千丈慮隕坑谷積冰峩峩
蔽此磴道時復側足同於焦原古木盤盤相繼偃仆橫枝
塞路偏能窘人萬籟無聲孤往絕迹與夫纍歎行客駭詫
陰霾易昏投宿無所眺重阜之繁複覩祥雲之澹汗此則
太行北上同此苦寒邛峽南馳避此危阻者矣夫人世險

易本非一途恆情苦樂乃別二念觀聽旣暢愁悲漸生景物過奇危機斯伏有如斯雪並在宙合而銷金帳裏不識戶外之寒玉門關前亦有軍中之樂嗟此行役幸免荷及家傳清風何必歌舞征駕旣息清境弗忘聊書所見援筆爲記

豫桐女士遺照題詞

昔者碩人頌美摹螭首之容華甘泉圖形闕燕支之顏色
而遺芳入夢武皇悼夫哀蟬望廬思人騎省傷夫隻鳥佳
俠韶光遺挂在壁徒寄愁於歌詠未傳神於繪事豫桐女
士碧葉獨秀璿源遠澄當穠李之芳年委舜華而蚤謝棠
蓀同年神傷秋月淚灑春風感形影之長乖藉丹青而寫
照垂柳四蔭幽蘭一叢盼姍姍其來遲喚真真而欲出翠
袖倚竹同其蕭清素手拈花悟彼禪悅比秦女乘鸞之畫
煙霧橫生肖宓妃驚鴻之致神光乍合此則胡天胡帝祇
益纏綿是耶非耶空傳仿佛者已錫瑞兩邁蒙楚愴懷珠

駢文

九

傷茲承授簡瞻仰玉照彤管有煒想見林下之風彩筆已
還愧題長儷之象

史記引尙書攷自序

漢京之學皆有師授龍門作史自述宗傳尙書一經獨不言所自出儒林列傳畧可攷其由來其時鼂錯受書未遠年代歐陽立學已歷歲時上溯沛南大師當屬再傳弟子故其義皆古義而其文實今文晉儒昧經率意妄詆畧陳其旨乃有六蔽自壁中蝌文謬託安國航頭逸字倏增方興唐頒學官寶此贗鼎守節正義司馬索隱未能別其異趣猥云不見古文不知臨淮蚤卒並無著述之編麟止絕筆詎誌巫蠱之禍乃執豐坊之魯學輒詆毛詩信商英之三墳反疑周易此一蔽也宋儒好用義理懸斷事蹟見夫

操詔天命謂西伯不稱王莽號宰衡謂元公無居攝因噎
廢食詎曰能通懲羹吹齏將無過泥而執彼目論繩夫舊
聞詩人受命之文以爲盡妄世家當國之義皆曰厚誣此
二蔽也漆書一卷本出西州古學數傳盛行東漢衛賈之
所傳合馬鄭之所遵循舉周禮以概唐虞是末師而非往
古居東避亂未合機宜祖甲稱賢殊乖事實昧者見其抵
牾乃加塗竄懸牛賣馬面目全非斷鶴續鳧參差不一此
三蔽也漢書云遷從安國問故堯典諸篇多古文說班用
夏侯之義本與歐陽不符孟堅之爲此言當時必有所據
以今攷之但見堯典衡山字非作霍洪範曰睿文不從容

然衡霍故有二名睿容亦疑後改至若金滕用蒙恬之舊
說微子以樂官爲太師非出古文義尤彰灼而淵如注疏
守孤說而背顓門默深古微襲疑文而汨家法此四蔽也
經生株守尠能博通不信漢書足攷廟制安知史記可證
經文或云不見全本故有缺殘或云多采襍說咸非本義
有能背俗而從古反謂信史而疑經豈知孔序初出已載
簡編湯征逸文且入甄錄而少見多怪將疑腫背之駝以
是爲非謬矜買璞之鼠此五蔽也史記一書或以故訓易
經或由今文本異或因文便從省或是傳寫致譌而考其
大旨皆可徵信近者通儒輩出罕知遷史足憑風雷改葬

懋堂以今文爲謬悠反國攝王樸園疑伏生爲老耄豈知
取證於史其說自明大孰未穫以前本有歷年之事相王
行政之後初無遠避之又乃不援史文以證師傳反徇末
學而違初祖此六蔽也錫瑞服膺伏書罔敢出入參攷太
史謂足據依甄所引用皆一字而千金撫其闕遺亦零珪
與碎璧徐裴張馬之說閒糾其違臧江孫段之書擇存其
是以見書紬石室實可證明聖經聲發金絲不同點竄舜
典云爾

兩漢詠史詩自序

詩人思古乃有楚茨諸篇詞客詠史肇興三良之什爰自
六代迄於三唐屬在大家之文率有懷古之作而濫觴伊
始波瀾莫肆椎輪甫導金羈未施逮乎元明厥有專集鐵
崖奇豔撫飛卿昌谷之遺西涯清矯開論宗文筆之體別
其古近每輕李而軒楊推其正變毋是此而非彼矣僕本
憾人少習史傳閒有撰述託諸短章上自七雄下逮六代
意興所及篇幅尙尠哀然成帙獨在兩漢誠以漢治近古
史文尤工凡一盛而一衰皆可喜而可愕始則赤龍受命
銅馬稱帝雲興芒碭雷震昆陽三傑翊運平鑿齒之磨牙

四七授鉞埽鼉聲與紫色則有叔孫禮樂彊華符命挾書
除律金絲之響乍騰以讖定禮玉牒之文斯鏤此一時也
文景繼治庠序未遑建武中興枹鼓初息至於武宣之世
明章之朝石渠署設攷金馬之文章臨雍禮成修袞龍之
法服文治斯鑠武烈更宏金人列於甘泉玉門開夫亭障
狼居勒銘遂致渭橋之謁龍沙坦步喜告蔥雪之平又一
時也運罔隆而不陂火久揚而欲沈故自元皇臨朝和帝
纂御雖恭儉之德有逾於前而魁柄之重漸移於下薰胥
擅國煬竈之禍深房闔持權北晨之患亟朋黨交構易謬
元黃戚宦互爭勢成水火乃致龍蛇襍處麟鳳不祥東海

蕭生和鳩自殺關西夫子大鳥陳寃又一時也由是哀平
短祚桓靈不君董公大賢欲法堯舜張趙常侍倚若父母
門樞白髮傳行王母之籌石上黃梁錢數河間之女遂使
玉璽墮地麋鹿寓城去丁傅而得黃龍始宮鄰而卒金虎
九錫開國起新室之豺聲千乘北邙逐平津之螢火又一
時也嗟乎高光二聖幾閱櫛沐之勞莽操一出遂遷龜鼎
之祚讀班范之史未免拊心問西東之都已成陳迹樂府
協律空夢想夫昌時茂倩解題非必仿其體製聊爲長短
之句藉作塊壘之澆濁酒三升但資喁噓廣武一歎誰是
英雄效李嶠汾陰之行敢自矜爲才子比空同漢京之詠

庶靡濫於風人爾

夏母高太恭人六十壽序

蓋聞魯侯燕喜成風有壽母之稱漢宮鵷鸞昭儀致祝延之頌翟衣晚貴衆仰尊榮娣袂先良蚤符元吉則有長生之藥出自將茶綏山之桃生於集蓼本小心之翼翼後大福於貞貞如夏母高太恭人有可徵焉我芝岑師稟靈匡廬銘績衛鼎福星照於一路霖雨被於三湘方其入直樞廷獨懷囊筆爰求造室爲戴香纓迺有北地良家東齊卿族漢津之水宜渡仙槎渤海之宗實生闡秀緣遇災於赤土遂來侍於朱門篝火護早朝之衣內羞攝中饋之職蓋自鳴環飭節克奉主君者凡數十年椎髻執勤佐成家政

者難一二述必推聖善宜用闡揚今夫女貞之利實惟闕
觀地道無成但曰坤順矧乎三心五燭星小則光微攝適
持門分尊而位下非翦翦如畏將以上偁爲嫌而粥粥無
能又失閑家之則迺能入麗絺綌出懋蘋蘩澹此功能歸
之斂抑銀手如斷罔矜正內之長冰襟不言靡恃專房之
寵仲嬀淑慎無僭黃裳絡秀賢明有光彤管是曰禮讓其
善一也師以故里烽烟都門迎養迂道而扶鳩杖開閣以
俟魚軒盡室偕來承上匪易迺能怡聲下氣鏘觴燧而益
虔合志同心韻珎璜而彌令鳴雞奉盥內則衿纓銀鹿弄
兒穀梁緩帶尊長稱其窈窕女君羨其柔嘉每上高堂無

須挾瑟同居一室何啻如琴是曰溫恭其善二也師營葬
歸南留家在北枚乘已去遺舉母於梁園韓翃方擢置章
臺於都下黃口年幼有待折蓼翠袖天寒無心倚竹機絲
不虛夜月蘊蒜常挂屏風盛養嬰婉維婁侮甫及師入京
聞訃旋又挈眷偕歸碧海塵生盜賊橫行之日黃河冰圻
耶孃喚女之聲扶持跋涉之間贊畫艱危之地需能出險
困不失亨是曰才能其善三也師之再還都也車過黃村
路逢青犢強搜盡篋圖劫嬰孩太恭人匿文祿於懷中擁
垂髫於沙上謂贏金可棄憑探阮籍之囊蘭玉堪珍肯捨
橋公之質聲情忼慨指畫從容樂羊貞妻不撓彊暴修羅

天女力卻羣魔而且暗識其人卒擒諸賊滕公雄氣車下
之兒得全虞詡多謀朝歌之盜竟獲是曰明智其善四也
儉爲美德詎豐約之頓殊勞生善心宜劬瘁而罔恤師自
儼直機務陳臬古潭凡此內政之修多由賢媛之助翼訓
正室佐璇闈之停辛侍書崇公窺金布之令甲至於緡錢
束帛出入有稽瓠蓄梅諸經緯悉當犢禪而議酒食龜手
而澣衣裳是曰恪勤其善五也鴈鳩有恩道在均養鳳皇
卜吉聲惟和鳴自來閨闈之中尤以雛穆爲本迺能遺孤
惠愛有逾於所生女誠端莊彌切於何恃而且翻羹怨婢
挾笏寬臧敬音重於鄉閭諄語弭乎箕帚山窮麥麴疾拯

河魚仁粟義漿困蘇轍鮒夫人椽斛徧覆慈雲般若楊枝
都含甘露是曰醴厚其善六也且夫福堂壽車由積累而
致戶樞流水匙朽腐之虞卷施拔心不改碧葉松柏淩凍
益堅銅柯太恭人昔在壯年勤勞阻疾茲當篤老怠惰猶
懲苦身如魯敬姜訓子若宋歐母固宜修心逢吉協洪範
之康彊卻疾延年占无妄之勿藥矧伊六善宜享百齡顯
子貴於公羊承

天恩於丹鳳鄴前瑜珥列諸孫以含飴握裏金錢兆九齡
之夢與期當設悅慶集稱觥錫純嘏於有壬數華年於周
甲錫瑞聽安昌之絲竹未拜後堂託秦晉之葭苧常聞穆

行謹敘劬勞之報藉申頌禱之忱誦都水列女之篇洵足
兼該衆美祝瑤池金母之壽自當游戲千春云爾

湖南糧儲道署按察使夏公墓志銘

公諱獻雲字喬臣號小潤亦號芝岑南昌新建人也豫章故郡騰彩斗牛之墟會計分支導源化熊之聖曾祖家瑜湖南寶慶府知府祖修憲江蘇華亭縣丞父廷松江蘇元和典史符分虎竹史頌神君枳屈鸞棲人稱仙尉積累家慶誕生國楨三世皆贈榮祿大夫公含辰象之淑精毓匡廬之靈秀幼克岐嶷長而徇齊服膺楹書傳庭誥於獨立捧手名宿蜚英聲於三吳年十七補博士弟子員宜黃黃樹齋侍郎欣賞奇文許爲偉器己酉選拔貢生朝考引見以七品小京官用籤分刑部入校

宣宗實錄獲麟書法王人貴於諸侯題鳳盛名郎官上應
列宿太乙神火授秘閣之書北斗高文修順宗之錄咸豐
四年補軍機章京時則海水羣飛軍書旁午承繕

密旨恆至宵分飛書椽燭之前草檄擅幕之下雖博山謹
慎不言溫室而留侯籌策見重樞廷累遷刑部主事員外
郎郎中兼方畧館協修纂修收掌官皋蘇繩染通法家
之言孫吳闇合識兵謀之旨虎鈴之經探其秘奧豕渡之
字訂其譌舛密勿從事十有餘年見星而奔兩次聞訃烽
烟楚闕江海懷魂崎嶇喪葬之間衡量忠孝之重俄而江
南克復北捻肅清馮勤積勞有命遷秩肅相指示歸功發

蹤同治九年 京察一等以道員分發湖南飭總軍需釐捐局務尋赴郴州衡州辦案劉晏多才兼領衆使趙禹無害不爲深文明年署按察使又明年授糧儲道加按察使銜尋加二品銜光緒二年十年再署按察使烟霄之翼旣展霖雨之澤彌宏楚南軍興以來草竊爲害公倡立保甲以清盜源仿官禮之遺文懲荆舒之苛法善化黃氏小兒被竊不獲嚴飭通緝卒擒其魁鄉民奉佛子之稱嬰孺得再生之慶民婦崔氏拒姦自盡獄久不決公法治凶狡昭雪貞魂秦臺懷清非必丹穴之利齊婦申枉可無赤地之災楚俗相沿賽神祈福大吏嚴禁羣情洶洶公明切曉諭

渤海之亂繩能治委曲調停邵氏之編管弗熱潛消未形之變尤有大造於民公又著八則以訓農清積弊以理漕金布之令曲盡人情紅朽之儲倍蓰舊額籌復蘇家之坵奏修花苗之隄微禹其魚灑彼沈水誰云黃鴻反乎芍陂定王古臺賈傳故宅蕪廢不理型鏡安施迺拓兩漢之舊基飭三湘之名蹟春秋佳日賓僚唱酬嘉禾繪圖探梅覓句培杞梓以授士植花木於宜園匪云宴游實以觀政是則九年足食非俗吏之持籌三法求情兼司徒之設教允宜入參鼎鉉出專封圻而大鵬搏扶暫息於六月倦羽知返上追夫二疏十二年奉

旨送部引見請假修墓告歸一攀南嶽之烟遂聽西山之
雨將迎頓廢得失渾忘望隆蒼生人惜辰告勝選綠野地
比午橋三徑未荒松菊秀如栗里九老高會鬚眉古於香
山方將宅壺中以頤真翔區外以遐驚而悲谷謝景泰岱
餞傾十四年十二月二十四日終於里第春秋六十有五
公舉半百家淹貫羣籍寄懷夔朗尤長咏吟聽政優閒酷
嗜風雅著有清嘯閣詩集行世元配羅繼配周皆封夫人
子敬孚四川候補知縣敬和光祿寺署正先公卒敬豫兩
淮鹽大使敬莊候選同知敬觀甲午科舉人敬有女九孫
承慶承恩承起承爵承禧承祖承治承樑二十二年十月

三十日葬公於洪崖龍潭斑石壠以錫瑞列在弟子重之
昏姻屬撰丹文以光元石錫瑞才非司馬蚤受文翁之知
學愧中郎謬紀楊公之烈敢揚盛德俾勒貞珉銘曰

夏自南宋顯於西昌明德之後苗興妣王綈褒紹學纓綬
製祥篤生我公造福湖湘貢登王庭參贊樞密泊乎外遷
兼司明弼園生青草倉餘紅粒德惠旣宣泯棼以戢天路
驂鸞江湄唱驪經世濟物未竟厥施公卧東山湘人怨思
公返道山湘人涕洟子孫繩繩青箱素業踵武光前承華
累葉託注幽篆深韜古匣永傳億齡足擅千秋

王黜笙墓志銘

生王氏名子庾字黜生江西德化人也祖某淮安衛千總父某光緒壬午科舉人生幼卽徇齊蚤習墳素黃琬對日馳江夏之聲百藥誦文辨琅瑯之稻九歲作聯語署齋壁有虎嘯龍飛宇內奇才等語是則神駒千里先呈天驥之材於菟三日已具食牛之氣初誦毛詩卽疑叶韻譏才老之非古議考亭之叵信雅愛騷賦詳注蟲魚匪務華以絕根必實事以求是遂使叔師前哲猶畏後生書簞洽聞不妨緣隙尊甫篤守道學服膺程朱而生覃思箋疏奮筆考據亦猶歆治左氏異中壘穀梁之傳遷慕孔書殊父談道

家之旨不强同於庭誥欲自闢夫顓門縹緲滿前丹黃盈
卷尊甫見之莞然不爲忤也生兄子庚博涉經史尤工詞
章比師友之相資每謳吟之互答有伯埴仲篴之應無兄
儒弟墨之嫌一試童軍卽振奇采霜蹄暫蹶頭角已嶄邑
名士桂君木輩折節訂交尤爲洪吏部貞一器異北海了
了龍門早登超宗英英鳳毛見賞方謂東陸西陸並矯長
離元方季方同旌羔雁乃悲吟病馬有心寒骨老之傷疾
卜郡城示玉折蘭摧之兆嘗作送春詩云寄語羲和快著
鞭予見黃仲則無題詩結句如是是豈玉谿有子其爲白
老後身金環再來竟似羊公故事耶識語不祥華年易謝

以光緒二十年正月二十七日卒年甫十九嗚呼和璧未
剖而卽抵之於淵驪珠旣探乃反鍛之以石搏搏大地惟
可埋憂穹穹彼天詎宜呵壁尤可哀者娶婦羅氏結褵三
月生卒無子以兄子特立爲後蔡女甫嫁已痛茅苴之詩
令嫺傷夫遽供薑橘之祭霜凋電碎嘻其酷矣尊甫與予
同年子庚予講舍肄業生也嘗稱厥弟之才且云欲從予
學乃雙丁盛名未得偕來而二惠競爽又弱一个子庚篤
於天性慟絕人琴屬予銘彼幽石以解其哀思金刀掩芒
旣悼王威明之逝華英凋殞請題袁滿來之碑銘曰
維生也才胡喪之早孰跼而壽孰顏而夭莊傷螻蛄賈感

服鳥欲齊彭殤莫問蒼昊

張孝達制軍壽序

代

粵惟歲在柔兆涒灘壯月初吉先期

詔賜湖廣總督張公壽奎藻煥耀於鑠萬年之庥保艾平
格眷求一德之佐薄海髦彥望風謳吟韜沂填門矧伊舊
屬允宜頌美以飾鳳邸祝延以侑爵觚惟是盛名鱣鱣光
於摘輔之象大猷載戴炳於迎延之符今將倚管窺天濡
毫畫日誠恐賦窮六合未免大愚詩擬九如猶多賸義敢
舉犖犖之大無取詹詹之言

國朝稽古同天扶微廣異洎更兵燹幾墜宗風公挺捫一
元璣鏡萬有凡石渠金匱之藏海上名山之記孔壁尾細

之字墨經右行之文靡不目識心通流分派別原其宗旨
尤在尊經因故訓索微言由顓家貫百氏聖功蒙養重諷
籀於學籙語錄空疏斥傳鐙爲外教乃知遞升堂奧必歸
漢儒指挂乾坤宜用經術是我公之學問文惟載道亦以
經世聲幌之繡無實案牘之體不尊公天章手分緯宿胸
貫未及弱冠首舉京兆逮乎立年蜚聲甲科廷對之策上
揖輩鬼封疆之才下攬田李有識占其遠到斯言驗於今
茲若夫燕許大筆揆滕策之光輝會昌一品謚邊庭於指
掌亦有孫卿佹詩敬禮小文咳唾之餘隨生珠玉賸馥可
丐對爲金膏是我公之文章一卷骺骹文弊滋甚分年程

課學殖益荒公榮駕星輅首開風氣編排書目指示綱宗
九流所出如志藝文三家之邨亦通津逮是以英英荆豔
濟濟蜀才論及南皮義皆北面江漢炳靈之集大變楚風
輶軒使者之語肇興川學是我公之教澤西鄰責言北庭
啟釁甌脫重棄行人失辭公抗論機宜豫籌戰備上方之
請槐里非狂割地之謀虞卿斯沮諫諍見聽封事傳誦清
流之名冠首神州之氣大伸譬猶魯連坐談秦軍聞而卻
走邦衡上疏金人購以千金是我公之風節晉絳大裨流
孳塞道誰憐赤地莫覩青天公奉揚仁風布濩甘雨一麾
甫出百廢具興碩鼠懲貪威加白簡蜚鴻滿野福爾蒼生

用使監門繪圖無嗟鄭俠青州捄困復遇富公是我公之
德政越雉不至海鯨橫行北圻旣徹藩籬南關尤嚴鎖鑰
公帷幄決勝巾扇臨戎竭慮籌邊之樓屈指解圍之計順
昌旗幟招撫劉錡大樹將軍協謀馮異士氣溫如挾纘軍
心固於投醪由是三帥凱歌喜聞朱鷺八公草木競翦長
蛇是我公之勲績鐵軌議上鄂城節移惟樊山開宴之區
卽使院持衡之地公力圖振作不諱富強礮雷機電取長
技於島夷絲布礦苗導利源於夢澤而且廣廈千萬生徒
二百宏規同夫兩粵擷秀及於三湘此則峴首銘功無慚
武庫南樓清嘯詎減文康是我公之經綸海軍失律江防

繹騷狼燧照於吳淞羽書馳於滬瀆公叔子緩帶潛伏吳
人謝公圍棋暗制底寇天門地戶內政軍令之嚴遠交近
攻兵家伐謀之術凡長算遠畧秘計深圖世俗所不及知
盈庭或未能諒倚扶桑之劍憾未補天麾魯陽之戈誠能
返日全局屢爭夫和戰纖塵不動於江淮則尤保障東南
禔福中外是我公之籌策夫天降雄彥恆永錫以洪算身
積功德每克享夫大年彼伏生申公無聞建白郭令裴相
不習丹鉛然猶尊同靈光壽比旗翼矧夫吉甫文武受祉
旣多申伯蕃宣降神維嶽旣兼諸賢而具美宜介百福以
延洪月會壽星期逢初度筵開燕喜歌北渚之秋風笛奏

鶴飛慶東坡之生日某帡幪幸託頌禱遙伸率僚屬而同
辭愧揄揚之未極所願黃扉入輔赤手擎天碧海銷塵白
頭報國擅鴻名於三不朽弗羨南極老人綿鶴算於百餘
齡遠同北平侯相

尚書大傳疏證自序

自暴秦燔坑經義堙沒而易主卜筮詩存諷誦春秋未箸
竹帛禮樂本無成書推原廢興匪咎煨燼惟尚書一經上
紀五家邈乎百篇末由再覩斯文未喪一老慙遺箸錄本
於秦官發藏先於孔壁五三六經之旨如日中天二十八
篇之文比宿北斗若夫別撰大義不盡發明本經而歐張
傳授皆出高足劉班畧志首列傳名漢世四家言詩二戴
述禮公羊經旨司馬史才考其記禮之辭多相出入序事
之畧亦堪證明是知山東之大師無若涕南之閎遠厥後
東京祖鄭南宋宗朱懿彼兩賢師法百禩而六藝撰定特

爲注釋儀禮通解多引傳文是則專家雖亡莫尋虎觀之
緒四卷具在猶見鴻生之遺降逮元明競逞虛誕俗學茂
古委之榛蕪空言禍經烈於秦火近儒蒐輯古書不遺餘
力而伏傳全本莫睹人閒吳中畧撫缺殘侯官復增校訂
揆之鄙見尚有譌漏乃重加補正爲作疏證仿孔沖遠之
例釋滯求通行量家令之流暢微挾隱而皇能舊疏莫可
據依摩詰古圖空傳仿佛拾遺訂墜有四難焉伏生生自
先秦多識古禮學興前漢是爲今文枝葉所嬗非止三家
尚書符節相同通夫十四博士乃自紅休一出赤伏中興
信列國陰謀之書用山巖疑似之說昧者遂疑今爲漢法

古是周文素王之制定自太常六典之篇可概上古四輔
匡主以爲周禮無文太子迎侯孰識異代之法今將祛此
大惑紹夫顓門而曲臺逸文塵珠散失石渠議奏碎璧湮
淪其難一也東京作章句必曲曲以敷陳西漢尚微言不
字字而比傅江都之述繁露太傅之傳韓詩比於是編實
堪鼎足乃或昧於古書之例徒以耳食自矜皋謨之言貢
士必欲強通多士之論宮城亦思影埒成王幼在襁褓不
解甚言非真梓材謂命伯禽務在穿鑿立異致爲此書詎
病實由誤會傳文今將辨明體裁析解淆惑而譌謬沿襲
或且強作調人摧陷廓清莫能比於武事其難二也漢通

天人多出齊學詩說五際春秋三科擬諸洪範之辭皆明
災異之旨故自漢至隋並著於史良以五行之義自成一
家之言宋人疾緯書如仇讎謂天變不足畏中候十八既
詆讐言大法九章皆從棄置今將甄極絃緯推明禹疇而
河洛遺文無由鉤擿向歆異說亦尠折衷其難三也金絲
旣振乃有壁書門戶斯歧多逞臆鄭君旣注是書自宜
恪遵勿失乃詆歐陽爲蔽冒信衛賈爲雅材閒下己意比
於箋毛或易本文同夫注禮易曰容爲曰容變大交爲南
交甘誓六卿解以周制堯典八伯義非虞官帝者之服五
章天子之城九里皆由泥古不免獻疑近人併伏鄭爲一

談昧古今之殊旨西莊之作後案阿鄭實多樸園之攷今
文詆伏尤妄今將別漢司農之注守秦博士之傳而庸俗
異視易謬元黃別定一尊莫分黑白其難四也錫瑞殫精
數年易藁三次旣竭駑鈍粗得端緒原注列鄭必析異同
輯本據陳閒加釐訂所載名物亦詳引徵冀以扶孔門之
微言具伏學之梗概世有達者理而董之

游七星巖記

越環海濱堙障是急撻菑之石取給會稽剝壁割腴穴土
成竅深入百丈忘其險艱中容千人乃爾橫出地藏發洩
坤靈呈獻人力旣窮巖口斯哆入窻習坎緇夫深幽虛中
重離空彼大腹若鑽巨瓠鑿開混沌之竅如剖大甕破擘
元黃之卵摩豁蕩魄鬼我聳觀若斯巖者可謂塵表之靈
境物外之奇觀矣爰以暇日招邀同游輕舟拍浮吳榜擊
汰風日旌旻陽春暄妍山陰道上巖壑交映縠紋鱗鱗水
波不興美越國之勝區想晉賢之高致雅興旣愜衡流方
羊巍然大觀鬱此巖畔青露石骨翠森山膚仰千峴紅俯

飲川淥空洞無物嶢嶢造天恍戴平天之冠儼翼雉尾之
扇旁爲孤峯卓立雲際細者似筆挺然森梢尤可異焉內
則紺宇杳窅琳宮藁標外鐫題名錯落丹碧日色眩爛寶
光雜呈有如神山縹緲波上入彼巖腹豁然開朗大殿中
闢羅列帝釋廣坐旁啟以供客游迴廊數曲厥惟僧居小
池澄泓乃有魚躍偉彼斧鑿闢斯靈宇別開世宙不覺阻
隘壑谷仰眺罔覩天日以手捫壁石氣陰陰戴石作天疑
出媧皇之鍊穿穴爲戶有類上古之居夫巢父一巢乃輕
天下壺公一壺自闢乾坤龍伯鼈釣何真何僞鵬運蜩化
何大何小各適其適以游逍遙况斯巖旁連鏡湖迴出塵

市地廣乎蝸角基崇乎蟻垤解衣盤礴幾忘日曛樂而不
書何以示後時同游者茶陵賀坦夫巴陵李珣卿山陰周
吉生而鹿門子爲之記

山莊翫月記

銀鴈驚秋金虎送爽予以旅次宿乎山莊時則晚暉墮紅
夕霧褰碧涼風游至暄濁初收客子倦遊泊焉就枕俄而
夢醒燭滅人靜更闌牀前光明中庭地白啟岫幌周步欄
月魄澹以燭幽天光凝而鏡壑長空一碧淨無纖塵明河
半灣挂在屋角星斗離離欲墜頭上清風習習砭人肌骨
樹陰交乎藻荇花影鬥乎龍蛇倚欄靜對撲三斗之俗塵
負手行吟銷數年之積慘頓覺玉宇瓊樓去人不遠姮娥
顧免時來親人不知所處在羈旅之間所息爲舍館之地
也夫人身處富貴則勢足炫耀而每嬰夫垢氛志在幽遐

則地遠俗累而恆苦其岑寂彼此互觀易地相笑而性之
所近不可強也卽若茲月曾無私照然銀燭畫屏或失幽
寔之致華燈錦幔且掩澄澈之光惟茲行役覩此異境遊
仙之夢不隔於寤寐梯雲之取無俟夫翀舉俯拾卽是者
吾人之樂取之無盡者造物之藏蓋人月雙清心境並徹
不可無述也辛巳七月十六夜記

徵刻朱文端公藏書十三種啟

昔夫子纂定六藝分臚四科武城傳其統宗西河發其章
句而天圓禮問洪纖不遺灑埽應對本末皆具是知大學
之教匪尚夫空談小學之功不專於故訓乃自東京宗高
密南宋禰新安黨同妒真因陋就寡家崇鄭學今文之傳
遂亡人增朱門義疏之緒幾絕道墜干禩弊同一軌揆諸
前賢之意詎必專己自封且紫陽晚訂禮經於司農未敢
置議誠以據禮求理斯實者非虛沿流溯源斯分者見合
乃師智自聖妄談龍象之禪嗜古過拘誤信麒麟之鼓操
戈互競佩劍相笑不有魁碩奚從折衷高安朱文端公學

爲帝師勦具國史明經青紫俯視韋平皓首丹鉛上攀伏
董一行作吏無廢下帷之勤窮年焚膏乃闢講幄之蘊盛
德赫咍蚤耀寰區遺書圭臬足資來禩必推其畧有可陳
焉公以八卦之分肇自犧畫十翼之作剏於龍蹲而輔嗣
清言徒供麈尾之執圖南異學忽有龜書之授羣言淆亂
折諸聖人三爻夢吞表其獨見殫極理數引申朱程不載
河洛之諸圖尤徵別裁之微旨作周易傳義合訂十二卷
素王有作天子之事旣膺赤鳥之命爰奮獲麟之筆左氏
凡例或疑後增當陽謬悠云承舊史兼綜三傳標金鎖之
名獨抱遺經逞玉川之臆公篤信衮鉞旁參權衡錄其事

實大義不虛尋其裒譏微言胥顯作春秋鈔十卷夫子曰
吾志在春秋行在孝經長孫諸家顏本斯授魯國三老口
傳已軼河間售僞司馬獻疑猥云孔壁之文乃有闡門之
句公用草廬校定之本埒易齋管窺之篇意取兼通間參
補義作孝經朱氏學一卷禮也者人倫之軌範經術之鈐
鍵蒼姬應運爰修官禮之書元聖立制實參夏殷之法絛
葛儀習赤龍肇興石渠制稱白虎議奏高堂傳禮小戴述
記鄭注陳其畧孔疏發其詳而殊時異宜聚訟多惑昌黎
好古猶曰難行正叔集說未能悉定公本徽國之家禮著
爲節畧宗臨川之纂言抒其心得蓋朱吳功兼攷證非飾

虛車文端學主朱吳兼收斷簡斟酌漢宋取其可安貫通
古今要諸有用性道之旨不薄夫容經曲臺之辭未湮於
理窟作儀禮節畧二十卷補禮記纂言三十六卷又以信
都之記文由叔孫之撰置黃門之訓瑕不揜瑜藍田之書
禮通於易家範述宋禮翼纂明方諸內則少儀抑亦支與
流裔能修質行何讓萬石之純若揚民風詎止一門之瑞
校定大戴禮記顏氏家訓張子全書溫公家範呂氏四禮
翼五種史肇西京爰紀循吏記出東觀始標名臣龍門勑
儒林之稱魚豢改儒宗之號全史汗漫未易披尋非藉篇
章曷由趨步公喉衿羣籍萌祗百家擇所依歸加之論贊

文章道學息門戶之爭牧令公卿取龜鑑之法編定歷代
名儒名臣循吏三傳盛矣哉言爲模範近而易行文如菽
粟美而可飽禮堂寫定無憾事之留考亭通解有功臣之
目錫瑞主講經訓獲覩藏書鑽仰靡窮服膺無間乃知衛
武耄學斯膺睿聖之名蕭傅立朝不墜經生之業而赤眉
挺亂青編煨燼羽陵蠹化莫問秦灰竹簡書亡難尋汲冢
今將重付剗氏廣遺後賢當懸國門之金庶貴洛陽之紙
名山之藏可發共十三種而非奢經世之學在茲更千百
年而不朽

史通惑經篇書後

尼山一老師表萬世論德在庶施功無所惟以述作之功
獨冠帝王而上易書肇前古不過編次其文詩禮創元公
亦非專精之業繫維赤鳥受命獲麟絕筆褒譏一字並非
沿襲斟酌四代詎同鈔胥所見所聞微言傳於齊學知我
罪我大義發於鄒賢蓋春秋爲萬世作經非爲列邦作史
文成數萬其旨數千元聖綴學不必皆爲赤制素王垂法
自當保以墨守而學海旣亡陋同蠡測經天之義付之管
窺子元本是史才未通經術欲以據事直書之例妄繩受
命制作之書何異北轍南轅方枘圓鑿執蕭何所造之律

疑皋蘇之法乖據洛下所推之天詆義和之算失世無愚
智皆知不然乃自左氏晚出杜侯謬悠治經者專誦魯史
之篇習聞當陽之解莫不以左義爲經旨以杜解爲傳意
譬之秦王不尊但知穰侯之貴漢帝充位惟服魏操之威
賣餅大官謬分軒輊箴膏起廢不守師傳渡江以來顛門
業喪寧道孔誤諱言服非信傳疑經爲日久矣其惑非子
元所獨亦非瞽儒能解說者或加曲護或恣詆譏皆未考
其致惑之由何能答其獻疑之旨今推本經義詳爲辨釋
褒貶之例二傳最明臧否之文左氏問具行以直道詎有
曲筆若鄭楚齊三君皆以疾赴遂沒紱文則以君臣大倫

非可忽視弑逆重惡不宜輕加夫子身非史官事未親睹豈得執此疑獄斷爲鐵案至於反不討賊藥不親嘗乃以明臣子之重防泐非常之異義趙盾書弑本由董狐許止之事蓋亦彰灼凝脂漏網比喻非倫矧茶弑原屬陳乞靈縊寶由楚比陽生觀從並非首惡以此爲惑母乃大愚善惡直書史官之實錄賢者爲諱春秋之微辭滅衛不書河陽言狩皆褒桓文之霸績豈有向背之私情若夫或書或不書非所諱而諱求之公穀庶得折衷左旣偏而不全杜尤誕而難信虎叛不記子卒不名晉葬吳盟齊止邾敗斯皆誼重尊親內諱國惡詎可執後世之史法議至誠之大

經春秋屬商乃啟西河之教大義口授必傳東魯之書汲
郡紀年魏人所撰當由師傳有自是以書法畧同杜氏後
序昧於斯旨以爲當時舊史率同此法夫子並不能自剗
義例專襲此等舊文因其所見殊偵乃至非聖無法子元
習於杜解沿其謬說則是馬遷史記豫襲班掾之辭陳壽
志書先偷蔚宗之作大可嗚噓奚云厚誣若夫公子陽生
公羊自有義例許男園蔡列國不乏重封卽有闕文無傷
大旨春秋重義不重事何必吹毛而索瘢夫子撰不刊之
書爲後王之則非因周禮舊法魯策成文故或大事而不
書或小事而必紀其文有畧有詳其例有正有變杜作集

解執其辭說謂經承舊史史承赴告聖人作經乃事勦說
斷爛朝報故非誣辭夫以萬世之師並無一書垂世所定
凡例皆出周公則四海儒林應禰西京之袞繡八方俎豆
可祧東國之章縫詎宜揚彼餘波沿其貽繆子元詆斥古
義分条虛美其意仍不過以汲墳爲信史杜解爲聖書遂
至追議龍蹲大有傲睨之語輕視鳳德遽加倚撫之詞駁
孟子之名言毀史公之精義推崇孔子率以爲非隆重春
秋更疑其失意圖翻案弊在昧經雖曰獷悍之言端由沈
溺之久大惑不解亟宜浴以蘭湯遺經獨抱願與參夫筆
削子元往矣何從釋疑後有達者庶使無惑

史通申左篇書後

自端門受命斯操制作之權西河傳經乃判高赤之旨獨有左氏不傳春秋或經闕而傳存或經詳而傳畧蓋其書本別行體殊傳注足以自成一史不必依傍聖經又以晚出不無竄亂創通大義非復素王之心顛倒六經皆由紅休之意賈服作注參用公穀門戶之見未甚源流之合可尋杜預始撥棄舊解排斥二傳釋例不免偏駁是非謬於聖人子元一孔之儒偏智所得能通左氏不解尚書是以學不純經才惟任史惑經之後繼以申左蓋謂邱明之聖逾於仲尼杜預之才優於游夏今就所揚權更爲折衷春

秋一經孔子所作列國秦漢人無異辭惟左氏以爲魯春秋本於周公子元遂謂始自姬旦案旦作春秋羌無前典豈得執一家之偏說背萬世之通議奪尼山之簡策上獻先君分泗水之筆削遠加冢宰說經之家古稱聚訟必須兩造具備乃可互證而明今無他書可憑惟是以左證左周禮所在御書之出持此自欺何能信後左與聖人同時不在弟子之列良以身爲國史未及從游雖有采摭之勤莫窺科旨之奧二傳授由子夏誼屬再傳義例皆出親承刺譏本難書見故左氏先箸竹帛適傳其粗迹二傳始由口授乃得其精微非可泥時代之後先定傳文之優劣左

氏所引名卿之論行人之詞秩然有章世稱富豔然穀梁清婉公羊辨裁各成一家並著三傳子元黨同伐異不思殫見洽聞揚左氏則置之青雲抑二傳則等之自鄧軒輊太過比儗非倫又謂寶錄付之邱明至疑孔經不可獨用善勸淫懼惟左氏不愧斯言夷攷左氏一書每輕忠義而獎篡弑孔父正色以豔妻行路爲譏仇牧死君與弑逆之督並列荀息言玷不免微詞泄冶立辟反受貶責而弑君趙盾盛稱宣孟之忠賊主樂書上比召公之德畧爲僂指豈所謂善勸淫懼者乎且夫王喬鳧履左慈羊鳴杜魄爲鵲荆屍變鼈子元極加揮詆屢見簡編左氏書如伯有相

驚申生顯見寶珪化而爲石絳市殺而仍蘇此何異於鳧
履羊鳴化鵠變隨而經外別事曲爲偏護豈靈異譎詭難
載於後世之書惟力亂神應存於三代之簡一棄一取詎
得爲平楚圍弑麋二傳不載慶封行戮已見其端蒯瞶得
罪先君勢難返國圍戚伯討者義之正夫子不爲者仁之
至二說本不相悖非可泥於一端公羊並無賢輒之文安
有獎進之失至於三國賊弑四君篡逐左氏雖稍見詳二
傳亦非盡畧此當統觀全傳未可輕呵古人古書兼采衆
家意在網羅散失或數說並記或二說俱存未嘗專主墨
守保咫尺而屏羣義遠師秦法別黑白而定一尊子元所

疑杵曰程嬰馬驚敗績之類或由見聞之異或屬傳寫之訛著書抵牾皆所不免必謂左傳無誤君氏卒言聲子殊近不詞暨齊平不稱燕無此書法他若衛宣烝姜伯玉出關以年攷之皆不能合豈得左氏獨是而馬劉盡非乎守一先生之言斷千載上之事有同豕蝨何異井蛙春秋屬商聖言昭著何可屏去卜氏增入邱明史公別魯君子於七十子之外正左氏不傳春秋之徵子元不識反違而妄引爲將伯疏失之誤固無譏焉

清嘯閣詩草敘

夫任運之道有常而發言之途不一春麗之製以入山林則俗蕭寥之音以登廊廟則野是以紉縵炫爛八伯歌風井田樸純老人擊壤闕宮有恤公子攄頌魯之辭王室夢爭退傳挺在鄒之作亞斯以降各騁厥秘金采鏤錯光祿獨嫻於廟堂風月留連陶令專宗夫隱逸或瓌璋以振采或沖溶以葆真繁昔詞人尠能兼善芝岑夫子牛斗紫氣豫章朱門擅大夫之九能通齊學之五際西江宗派咀含黃陳大家體裁追逐李杜參其正變靡濫風人覈其遭逢足稱年譜當夫曳長裾游太學逸轡初騁雄筆始奮擬謝

湖口金膏染毫摹鮑廬山黛色落紙馬當風利子安序閣
之才牛渚月明彥伯租船之詠川原鬱其今感風雨觸其
古悲俯唱扣舷則潛虬夜聽高吟題壁則征馬旋瘖此一
境也已而秋部分曹樞廷傑直橋通玉竦障對金雞清露
點衣衛國夸遇細香惹袖嘉州紀榮則有燕市酒徒鳳城
詞客述歡梓澤送別河梁江亭晚涼賞秋鬪韻玉河冰凍
銷寒聯吟此又一境也山水模範元嘉枌其規時事閔傷
建安摩其體少游覽則見狹無感慨則響浮師北轍南轅
高掌遠蹠淳吳越之露楫裊荆豫之風駟橫流滄海飈唳
驚心緬邈山河煙霜楚矚秦川登瀛之作標名七哀平原

入洛之詞騰譽二妙此又一境也福星照世屏風記名竊
幸三湘之間得逢萬家之佛本來仙吏居近瀛洲矧有宜
園足供吟賞每值訟庭花落燕寢香凝政事閒而毫翰揮
賓僚集而酬唱洽飛來墨雨總繫蒼生寫入華笈益彰清
節文翁石室多儲西蜀之英庾亮胡牀不廢南樓之嘯此
又一境也鶴書天上飄唱湘湄借冠有心留鄧無術賈傅
宅古慨宣室之空徵定王臺高望長安而不見師逸興飈
發委心去留澹疏傳之宦情求向子之夙好眺祝融之日
霄漢心懸開衡嶽之雲精誠天鑒此又一境也由是休神
家銜息景故園弔琵琶於江頭撫香爐於塵外北隴猿鶴

無怨蕙帳之空東山絲竹還尋棋墅之樂煙墨時染霞想
益崇雖閣外江湖不忘魏闕而壺中日月何異仙家九老
圖成同人韻疊地非蓮社觴詠並宜人似香山鬚眉皆古
碧筍黃菊多賞心之辰瑤草紫芝有遺世之概此又一境
也自己酉至戊子都爲清嘯閣詩草十六卷嶽游草一卷
蘇門長嘯脩然鸞鳳之吟子野清歌輒有奈何之喚半生
吏隱常適其天倪中年哀樂不煩於陶寫自非靈響遠結
淵懷獨澄烏能追正始之音備衆家之體乎錫瑞湘中校
士著籍最先海上尋師刺船已晚談經馬帳詎忘飲水之
思問價雞林幸覩藏山之業拜觀宏集謹綴小言念廿載

之從游當執挺作門生之長承九天之咳唾敢升堂窺夫子之牆聊效引喙莫窮鑽仰彥升序文憲之集藉以酬知記室品陳思之詩難爲贊美云爾

夏芟脰壺天大隱圖題辭

夫陸沈閭里市南銷聲蜚遞金門東方晦迹小隱陵藪大
隱朝市各適其適以全其天行吾道於龍蛇任人呼以牛
馬何必挂瓢潁水始曰逃堯采芝商顏方稱避世拙齋主
人生自華廡少無宦情平原翩翩濁世蟬蛻揚子寂寂太
空鴻冥靜不撓氛貞不絕俗未能長羣猿鳥方且游戲人
閒於是寄意斯圖託名大隱泉石四合逍遙濠濮之觀乾
坤一壺跌宕煙霞之氣豈非含道大賁遊神至虛者乎僕
世網久縛望塵中慚空覽九仙之方難爲五嶽之舉求縮
地之法心慕長房代昇天之行意同明遠云爾